

खबरां

- राष्ट्रपति द्रौपदी मूर्मु होरें राई-बाई क्षेत्र च नीति बनाने ते फैसले लैने च महिलाएं दी मती भूमिका दा आह्वान कीता।
- प्रधानमंत्री नरेंद्र मोदी होर कल असम दे गुवाहाटी थमां पी.एम किसान योजना दी 22मीं किशत जारी करडन।
- लोकसभा दे स्पीकर ओम बिरला होरें आखेआ ऐ जे ओह सदा इस गल्ला गी यकीनी बनांदेन जे सदन दी कार्रवाई निष्पक्षता, अनुशासन ते नियमें दे मताबक कीती जा।
- जम्मू-कश्मीर दे साबका मुखमंत्री फारूक अब्दुल्ला पर कीते गेदे हमले दी व्यापक जांच सरकार करग।
- ईरान आसेआ परमिशन गल्फ च कीते गेदे समुंद्री हमले दे बाद पच्छमी एशिया च तनाऽ बधी गेआ ऐ।
- स्विस् ओपन बैडमिंटन च किरण जार्ज अज्ज रातीं बेसल च पुरुष एकल प्री क्वार्टर फाइनल च हांगकांग दे जेसन गुनावान कन्नै मकाबला करडन।

<><><><><><>

Prez. Women Role

राष्ट्रपति द्रौपदी मुर्मू होरें आखेआ जे कृषि, खासकर कृषि खाद्य प्रणालियें च कम्म करने आहली महिलाएं दे नेतृत्व गी प्रोत्साहित करना महत्वपूर्ण ऐ। राष्ट्रपति होरें अज्ज नमीं दिल्ली च कृषि खाद्य प्रणाली च महिलाएं दी भूमिका पर त्रै रोजा वैश्विक सम्मेलन दा उद्घाटन कीता। राष्ट्रपति मुर्मू होरें आखेआ जे इस खेत्तर च सबनें स्तरें पर महिलाएं दी मती भागीदारी कन्नै लैंगिक समानता गी ध्यान च रखदे होई कृषि विकास गी बाद्दा मिलग। इस मौके पर राईबाई ते करसान कल्याण मंत्री शिवराज सिंह चौहान होरें आखेआ जे देसै च राईबाई च महिलाएं दी भूमिका ऐ ते ओह एह्दे च योगदान दिंदियां न। उनें आखेआ जे एहू मंच पूरे देसै च राईबाई अनुसंधान नेटवर्क च महिला केंद्रित अनुसंधान कम्में गी गति ते दिशा प्रदान करग।

<><><><><><>

PM-Kisan

प्रधानमंत्री नरेंद्र मोदी होर कल असम दे गुवाहाटी थमां प्रधानमंत्री किसान सम्मान निधि योजना दी 22मीं किस्त जारी करडन। राईबाई ते करसान कल्याण मंत्री शिवराज सिंह चौहान होरें नमीं दिल्ली च मीडिया आहलें कन्नै गल्लबात करदे होई आखेआ जे प्रधानमंत्री मोदी सिद्दा लाहू दे राएं तकरीबन 9 करोड़ 32 लक्ख करसानें दे बैंक खातें च 18 ज्हार 640 करोड़ रपे पांगन। मंत्री होरें आखेआ जे सरकार नै करसानें आस्तै ए.आई आधारित डिजिटल प्लैटफार्म दे पैहले चरण दा शुभारम्भ कीता। एहू करसानें गी राईबाई सरबन्धी जवाबें दी व्यापक जानकारी देग।

<><><><><><>

Dandi March Anniversary

अज्ज पूरा देश ऐतिहासिक दांडी मार्च दी 96मीं बरेगंड मना करदा ऐ। दांडी मार्च दी शुरूआत 1930 च इससै दिन होई ही जेह्दे च महात्मा गांधी ते उंदे अनुयाइयें दे समूह नै नमक उत्पादन पर अंग्रेजें दे एकाधिकार गी चनौती देने लेई अहमदाबाद दे साबरमती आश्रम थमां गुजरात दी 24 दिनें दी अहिंसक पैदल यात्रा कड़ी ही। इस आंदोलन नै देशव्यापी नागरिक अवज्ञा आंदोलन गी होर भडकाया। उपराश्ट्रपति सी.पी राधाकृष्णन ते प्रधानमंत्री नरेंद्र मोदी होरें महात्मा गांधी ते इस ऐतिहासिक दांडी मात्र च हिस्सा लैने आह्ले सारे बीर स्वतंत्रता सेनानियें गी नमन कीता।

<><><><><><>

World Kidney Day

अज्ज विश्व किडनी दिवस ऐ। इस मौके पर सेहत ते परिवार कल्याण मंत्री जगत प्रकाश नड्डा होरें किडनी गी स्वस्थ रखने ते ओह्दे कन्नै सरबंधत बमारियें दी तौले पंछान ते रोकथाम लेई जागरूकता बधोन उप्पर जोर पाया।

<><><><><><>

LS_Adjourned

एल.पी.जी संकट पर चर्चा दी मंग सने बक्ख-बक्ख मुद्दें पर विपक्ष आसेआ हंगामे दे मगरा लोकसभा गी दपैहरी 2 बजे तगर स्थगित करी दित्ता गेआ। दपैहरी 12 बजे स्थगन दे बाद जिसलै सदन दोबारा कट्टा होआ उसलै स्पीकर ओम बिरला होरें विपक्षी पार्टियें आसेआ उनेंगी हटाने दी मंग करदे होई आंदे गेदे प्रस्ताव पर इक बयान दित्ता जेह्दा कल सदन नै खारिज करी दित्ता। ओम बिरला होरें आखेआ जे उनें म्हेशां एहू यकीनी बनाने दी कोशिश कीती ऐ जे सदन दी कार्रवाई निष्पक्षता, अनुषासन, संतुलन ते नियमें दे मताबक कीती जा। स्पीकर होरें साफ कीता जे सदन दा नेता होऐ, विपक्ष दा नेता होऐ जां कोई होर सदस्य, सारें गी सदन च सिर्फ नियम ते प्रक्रिया दे मताबक गै बोलने दा अधिकार ऐ।

<><><><><><>

Chief Whip BJP

लोकसभा च भारती जनता पार्टी दे मुख् व्हिप डॉ. संजय जायसवाल होरें लोकसभा दे स्पीकर हुंदे खलाफ अविश्वास प्रस्ताव आहनने पर कांग्रेस पार्टी दी नुक्ताचीनी कीती ऐ। आकाशवाणी समाचार कन्नै गल्लबात करदे होई श्री जायसवाल होरें आखेआ जे विरोधी पार्टियां इस मामले च लोडचदा समर्थन जुटाने च नाकामयाब रेईयां ना।

<><><><><><>

Farooq Attac k Probe

पुलिस नै जंदी रातीं जम्मू च इक्क ब्याहू समारोह दरान साबका मुख्मंत्री ते नेशनल कांफ्रेंस दे अध्यक्ष फारूक अब्दुल्ला हुंदी हत्या करने दा प्रयास करने आले कमल सिंह जम्वाल दे बारे ब्यौरेवार तफ्तीश शुरू करी दित्ती ऐ। आकाशवाणी जम्मू दे संवाददाता नै खबर दित्ती ऐ जे पुलस 63 बरें दी बरेसू दे कमल सिंह जम्वाल दी निजी ते सामाजिक जिंदगी बारै पता ला करदी ऐ। एह्दे अलावा पुलस हत्या दे प्रयास पिच्छे मकसद दा पता लाने गितै ओह्दे केह्डे-केह्डे संगठनें कन्नै सरबंध न, ओह्दे बारै बी

पता ला करदी ऐ। इयां गे डॉ. अब्दुल्ला हुंदे पर हमले बारै प्रतिक्रिया दिंदे होई उपमुख्यमंत्री सुरिंद्र चौधरी होरें आखेआ जे एह स्वता सुरक्षा च चूक होई सकदी ऐ। कमल सिंह जम्वाल गी जम्मू सिटी अदालत नै 5एं दिनें दी पुलस हिरासत च भेजी दित्ता ऐ।

<><><><><><>

Nadda Farooq Attack

राज्यसभा च सदन दे नेता जगत प्रकाश नड्डा होरें भरोसा दोआया ऐ जे जम्मू-कश्मीर दे साबका मुख्यमंत्री फारूक अब्दुल्ला हुंदे पर होए दे हमले दी व्यापक जांच कीती जाह्ग। विपक्ष दे नेता मल्लिकार्जुन खड्गे हुंदे आसेआ पुट्टे गेदे मुद्दे पर नड्डा होरें आखेआ जे सरकार इस मामले गी गंभीर कन्नै लै करदी ऐ। नड्डा होरें आखेआ जे केंद्र सरकार वरिष्ठ राजनेताएं सने हर नागरिक दी सुरक्षा आस्तै बचनबद्द ऐ। उनें आखेआ जे एह गंभीर चिंता दा विशे ऐ ते सरकार एहदी व्यापक जांच यकीनी करोग।

<><><><><><>

Attack-Condemnation

जम्मू ते कश्मीर प्रदेश कांग्रेस कमेटी दे अध्यक्ष तारिक हामिद कर्रा होरें साबका मुख्यमंत्री डॉ. फारूक अब्दुल्ला हुंदे पर होए दे जानलेवा हमले दी निंदेआ कीती ऐ। उनें जोर देइयै आखेआ जे जेडा बी इस लेई जिम्मेदार ऐ, ओहदे पर कनून तैहत कार्रवाई होनी लोडचदी। आकाशवाणी जम्मू संवाददाता दी रिपोर्ट मूजब पी.सी.सी नै इस घटना दी सख्त लफ्जें च निंदेआ कीती। उनें आखेआ जे इयै नेइयां घटनां बड़ियां गै झंकझोरने आहिलियां ते चिंताजनक ना बीजेपी दे नेता जेहानजेंव सिखाल होरें बी इस हमले दी निंदेआ कीती।

<><><><><><>

Railway AI

रेलवे मंत्री अश्विनी वैशणव होरें आखेआ जे भारती रेलवे नै अपने कम्मकाज दी समर्थ ते सुरक्षा च बाद्दा करने लेई ए.आई ते एम.एल.डी संयंत्रें गी तैनात कीता ऐ। श्री वैशणव होरें एह जानकारी लोकसभा च इक सोआलै दे लिखित परते दरान दित्ती। उनें आखेआ जे त्री नेत्र सरिस्ते गी धुंध ते खराब मौसम दरान लोको पायलेट दी मदाद आस्तै विकसित कीता गेआ ऐ।

<><><><><><>

Coach-Attached

उत्तरी रेलवे दे जम्मू रेलवे डिविजन नै यात्रिएं दे रश गी दिखदे होई जम्मू न्यू दिल्ली राजधानी एक्सप्रेस च बाद्दू थर्ड ए.सी कोच आहली सुविधा गी अगगे बदाने दा फैसला कीता ऐ। आकाशवाणी जम्मू संवाददाता दी रिपोर्ट मूजब बाद्दू कोच जेडे रेल गड्डी नंबर 12426 राएं 7 मार्च लेई उपलब्ध हे ते एह 14 मार्च लेई तय हे, हुन 13 मार्च ते 15 मार्च लेई बी उपलब्ध होडन। एहदा मकसद वेटिंग लिस्ट गी घट्ट करना ते यात्रिएं गी सहूलत उपलब्ध करोआना ऐ।

<><><><><><>

West Asia Tension

परमिशन गल्फ च ईरान आसेआ कीते गेदे समुंद्री हमले दे बाद पच्छमी एशिया च तनाऽ बधी गेआ ऐ। ईराक दे बसरा दे कश अमरीका दे कच्चे तेल दे टैंकर पर हमले च भारती क्रियु दे सदस्य दी जान चली गेई। सोशल मीडिया पोस्ट च ईराक च भारती दूतावास नै आखेआ जे टैंकर सेफसिया विष्णु, मार्शल द्वीपें दे झंडे हेठ जा'रदा हा। उनें एहू बी आखेआ ऐ जे बाकी 15 इंडिया क्रियु मेम्बर्स गी सुरक्षत थाह उप्पर पजाया गेआ ऐ।

<><><><><><>

NIA

राश्ट्री जांच एजेंसी एन.आई.ए नै पुंछ जिले दी केई सारी थाहें पर छापेमारी कीती। एहू छापेमारी आतंकवाद सरबंधी गतिविधिएं ते आतंकवादिणं गी रपेआ-पैसा उपलब्ध करोआने दे सरबंधे च कीती गेई। सूत्रें मूजब एहू छापेमारी एफ.आई.आर नंबर 7/24 दे सरबंधे च कीती गेई। केई सारे व्यक्ति जेडे आतंकवादी गतिविधिएं कन्नै सरबंधित न जां फही रपेआ-पैसा उपलब्ध करोआने च शामिल न, दे ठिकानें पर कीती गेई ऐ। अधिकारिक सूत्रें दस्सेआ ऐ जे एहू छापेमारी चला'रदी जांच दा हिस्सा ऐ।

<><><><><><>

Swiss Open Badminton

स्विस ओपन बैडमिंट प्रतियोगिता च भारती खडारी बेसल च अज्ज रातीं अपने-अपने प्री क्वार्टर फाइनल मैच खेडडन। मर्दे दे सिंगल्स च किरन जार्ज दा मुकाबला हांगकांग दे जेसन गुनावान कन्नै होगा। किरन नै अपने पैहले मैच च साबका विश्व चैंपियन लो-कीन यू गी हराया। दुए पास्से गुनावान नै अपने पैहले मैच च भारत दे किदांबी श्रीकांत गी मात दितीं मर्दे दे डबल्स मुकाबले च सात्विक साईराज रंकीरेड्डी ते चिराग शेट्टी दी जोड़ी दा मुकाबला जपान दे हेरोकी पोकामोरा ते क्योहेई यामाशिता दी जोड़ी कन्नै होगा। एहूदे अलावा हरीहरन ते एम.आर अर्जुल दी भारती जोड़ी बी अपना प्री क्वार्टर फाइनल मुकाबला खेडग। इंदा मुकाबला चीनी ताइपे दी चैंग कोआन चैन ते लिन बिंग वेई कन्नै होगा। इयां गे मिक्स्ड डबल्स च धुरुव कपिला ते तनिशा क्रास्तो दी भारती जोड़ी दा मुकाबला चीन दी गाओ जिया ते वू मेंग जिंग दी जोड़ी कन्नै होगा।

<><><><><><>

PIB-Workshop

जम्मू-कश्मीर ते लद्दाख दे प्रेस इंफारमेशन ब्यूरो-पी.आई.बी नै प्रेस क्लब जम्मू च (वार्ता) नांऽ कन्नै इक्क मीडिया कार्यशाला दा आयोजन कीता जेदा विशेषार हाए.आई इम्पैक्ट समिट। इस कार्यशाला दा मकसद पत्रकारें कन्नै गल्लबात गी होर मजबूत करना, राश्ट्री मसले उप्पर गल्लबात गी बढ़ावा देना ते पत्रकारें दी पेशेवर समर्थ च बाद्दा करना ऐ। निदेशक नेहा जलाली हुंदी अध्यक्षता च आयोजित कीती गेदी इस कार्यशाला दरान पत्रकारें दी आर्टिफिशल इंटेलीजेंस बारै समर्थ ते ज्ञान च बाद्दा कीता गेआ। माहिरें पत्रकारिता, संचार ते डिजिटल मीडिया च ए.आई दे बधदी भूमिका बारै पत्रकारें गी दस्सेआ-दसाया।

<><><><><><>

CM-SASCI

मुख्यमंत्री उमर अब्दुल्ला होंरें केंद्र शासित प्रदेश च एस.ए.एस.सी.आई स्कीम तैहत तोड चाढे जा'रदे कम्में दा जायजा लैता। अधिकारिक प्रवक्ता नै दस्सेआ जे मुख्यमंत्री होंरें मुतल्लका अफसरें गी हिदायत दिक्ती ऐ जे ओहू समें सिर कम्में गी सबूरा करन ते परियोजनाएं दी कारगर ढंगै सिर निगरानी पर जोर पाया। उनें जोर देइयै आखेआ जे स्कीमें दे लाहू जमीनी सतह पर पुज्जने लोडचदे। मुख्यमंत्री होंरें अफसरें गी हिदायत कीती जे ओहू समें सीमा दा पूरा ध्यान रक्खन ते कुसै बी प्रोजेक्ट दे फंड दा पूरा ते सेई ढंगै सिर इसतेमाल यकीनी करन।

<><><><><><>

IMD

मौसम मैहकमे नै गुजरात च लू चलने दे असार दस्से ना। मौसम विभाग नै अरूणाचल प्रदेश, असम ते मेघालय च कल भारती बरखा दी पेशनगोई बी कीती। एहदे अलावा मैहकमे नै अगले 3 दिनें तोड़ी छत्तीसगढ़, विदर्भ, सिक्किम, नागालैंड, मणिपुर, मिजोरम ते त्रिपुरा च गरज दे कन्नै कनियां पौने दी संभावना जताई ऐ।

<><><><><><>